



5. december 2013

Inatsisartut suleriaasianni § 37 naapertorlugu Naalakkersuisunut makkuninga apeqquteqaateqarpunga:

Apeqqutit

Eqqorpa Naalakkersuisut Nunatta Isiginnaartitsisarfia neriorsorsimagaat 3 millioner koruuninik tipsernermit lottornermillu aningaasanit, aningaasaliissutit C-init, tapiiffigineqassasoq?

Tipsernermit lottornermillu aningaasat, aningaasaliissutit C-it, 40 %-ii Nunatta Isiginnaartitsisarfianut inniminnigaasalissappata tamanna kulturikkut suliniarnernut allanut qanoq sunniuteqassava?

(Inatsisartunut ilaasortaq Harald Bianco, Inuit Ataqatigiit)

Tungavilersuut

Kultureqarnermut Naalakkersuisoq oqaaseqarnikuuvoq Nunatta Isiginnaartitsisarfianut 3 millionit sipaarutigineqartut tipsernermit lottornermillu aningaasat atorlugit taarserneqarsinnaassasut.

Tipsernermit lottornermillu aningaasat, aningaasaliissutit C-it, tamanut iluaqutaasussanut siunertanut atugassiasut 2014-imi 7,2 millioner koruuniupput. Taakkunanga 3 millionit 40 % missarivaat. Taamaammat tamanut iluaqutaasussanut siunertanut aningaasaliissutigineqartartut ilangaatsiarsui Nunatta Isiginnaartitsisarfianut inniminnigaasalissapput. Tamattali nalunngilarput aningaasaliissutit C-init qinnutigineqartartut peqatigiiffiit inuppaallu assigiinngitsut amerlasuut iluaqutigisaraat. Taamaammat taakku siunissami suliniutiminnut ajornarnerusumik aningaasannanniartallissasut avaqqunneqarsinnaassanngilaq.

Aningaasanut inatsimmi takuneqarsinnaavoq tipsernermit lottornermillu aningaasanit Kalaallit Nunaata pinnattassai 2013-imut naleqqiullugit 2014-imi amerlanerussasut. Taamaattorli taamatut amerlisaasoqaraluartorluunniit tassa aningaasaliissutit C-it Nunatta Isiginnaartitsisarfianut atorineqartussaangitsut kulturikkulli suliniutinut allanut atorineqartussaasut 1 millioninik ikileriassapput.

Siumungaaq qinnutigissavara apeqquteqaammi apeqqutit tamarmik ullut qulit suliffiusut qaangiutsinnagit akineqassariissasut.